

七十二家集

陸清河集卷之三

晉吳郡陸雲士龍著

明閩漳張爨紹和纂

詩

贈鄭曼季四首

谷風

五章有序

谷風懷思也君子在野愛而不見故作是詩
言其懷思之也

習習谷風扇此暮春玄澤墜潤靈爽烟煴高山

世
景喬木興繁蘭波清踴芳澣增涼感物興想
念我懷人

習習谷風載穆其音流瑩鼓物清塵拂林霖雨
嘉播有滄淒陰歸鴻逝矣玄鳥來吟嗟我懷人
其居樂潛明發有想如結予心

習習谷風以溫以涼玄黃交泰品物含章潛介
淵躍候鳥雲翔嗟我懷人在津之梁明發有思
凌波褰裳

習習谷風其集惟高嗟我懷人於焉逍遙鸞棲

高岡耳想雲韶翔鳳墜夕和鳴興朝我之思之
言懷其休

習習谷風其音孔嘉所謂伊人在谷之阿虎質
山嘯龍輝淵蟠維南有箕休其和有棣斯畢
俾爾滂沱懿厥河漢惟彼太華明發有懷我勞
如何

鳴鶴

四章
有序

鳴鶴笑君子也太平之世君子猶有退而窮
居者樂天知命無憂無欲碩人之考槃傷有

德之遺世故作是詩也

鳴鶴在陰戢其左翼肅雍和鳴在川之側假樂
君子祚爾明德思樂重虛歸于其極嗟我懷人
惟馨黍稷

鳴鶴在陰其鳴喈喈垂翼蘭沼濯清芳池假樂
君子其茂猗猗底之瑰寶有餐瓊瓌乃振袞裳
襲爾好衣嗟我懷人啓襟以唏

鳴鶴在陰其儀藹藹謂天蓋高和音于邁假樂
君子篤膺俊乂穆風潛烈興雲戢薈德茂當年

時衍嘉會安得輦藻吹爾綰帶嗟我懷人心焉
忼慨

鳴鶴在陰載好其聲漸陸儀羽遵渚回涇假樂
君子祚之篤生德耀有穆如瑤如瓊安得風帆
溱渚滂滅景遺雲雨爾在北冥嗟我懷人惟用
傷情

南衡

五章
有序

南衡矣君子也言君子遯世不悶以德存身
作者思其以德來仕又願言就之宿感自駒

之義而作是詩焉

南衡惟嶽峻極昊蒼瞻彼江湘惟水泱泱清和有合俊乂以臧天保定爾茂以瓊光景秀濛汜頽逸扶桑我之懷矣休音峻揚

穆穆休音有來爾雍沈波涌與淵芳馥風條虛養恬照日遺蹤考槃遵渚思樂潛龍我之懷矣寘爾華宮

和璧在山荆林玉潤之子于潛清輝遠振克稱輜德作寶有晉和聲在林羽儀未變我之懷矣

有客來信

風雲有往應
地山淵清琴
瑟彈宮商乘
絃類族知感
有命自天夷
叔希世猶謂
比肩矧我與
子姒會斯年

我之懷矣在
彼北林北林
何有於煥斯
文瓊瑰非寶
尺牘成珍豐
華非妙得意
惟神河魴登
俎遺答清川

高岡

四章

瞻彼高岡有
猗其桐允也
君子實寶南
江員規

啓俗沈矩履方泳此明流清瀾川通陟彼衡林
味其回芳

馥馥回芳綢繆中原祁祁庶類薄采其芬棲遲
泌丘容與衡門聲播東汜響溢南雲

穆穆閭闔南端啓籥庶明以庸帝聽式闕有鳳
于潛在林棲翮非予之祚孰與好爵

幽居玩物顧景自顧發憤潛惟飭飭有思予矣
忘此終然胥來企予與言惟用作詩

鄭曼季答陸士龍四首附

鴛鴦

六首
有序

鴛鴦美賢也有賢者二人雙飛東嶽揚輝
上京其兄已顯登得朝而弟中漸婆娑衡
門然其勞謙接士吐握待賢雖姬公之下
白屋涖泗之餐三千無以過也乃肯垂顧
惠我好音思樂結永好之懽云爾

鴛鴦于飛在江之涘和音反暢拊翼雙起朝
遊蘭池夕宿蘭沚清風翕習扇彼蘭茝凌雲
高鴈載翔載止

鷺鷥于飛載飛載吟有鬱浚藪實惟桂林芳
條高茂華繁垂陰爰翔爰翔爰憩其南有馥
清芬協我好音

鷺鷥于飛乘雲高翔有嚶其友戢翼未翔澹
澹素波容與趨倡雖曰戢止和音遠揚我有
好爵與子偕嘗

鷺鷥于飛徘徊翩翩載頡載頡命侶鳴羣有
鬱蘭皋洲彼清源駕言遊之聊樂我云思與
佳人齊耀順川

鴛鴦于飛或飛或遊習習谷風扇彼清流春
草揚翹龜龜沈浮感物興想我心長憂誰謂
河廣曾不容舟企予望之搔首踟躕

鴛鴦于飛載和其鳴懷爾好音寡我中情人
亦有言心得遺形授我木底報爾瑤瓊匪繫
曰報永好千齡

蘭林

五章
有序

蘭林權至好也有君子世濟其美英名光
茂遭時暫否福德衡門顧我殷勤屢辱德

音思與結好以永不刊

瞻彼蘭林有翹有秀有斐君子邦之碩茂厥
德伊何固天攸授如川之源如山之富回流
清淵啓襟開裕縉紳瞻風民用胥附

猗猗碩人如玉如金浚其明哲克廣德心習
習飢風吹我棘林飛鵑羣至允懷好音悠悠
征徒輜德鮮任嗟我猗人和樂實忱

在昔延州鵠鳴江涯今我陸子曠世繼奇身
乖千載德音並馳漸鴻遵渚宛其羽儀安得

高風騰翻天池

飛龍蜿蜒山谷升氣猛虎嘯吟清風高厲情
同來感數乖身逝夷鮑齊懽專名故世愷悌
君子民之攸暨咨予邁時千載同愛

垂冀之會匪詩不宣嗟我懷人斯恩斯勤德
育來詎有蔚其文菽菽兔兔匪迹不存誠在
心德愛結忘言

南山

五章
有序

南山酬至德也有退仕衡門脩道以養和

棄物以存神民思其治士懷其德或思置之列位或思從之信宿詩人嘉與此賢當年相遇又屢獲德音情懽心至故作是詩焉

陟彼南山言采其蕭樂只君子邦家之翹克茂厥猶韜德是收聊道以儉廣愛以周嗟我懷人永好千秋

瞻彼江潭言釣其鱣有美碩人自公退處余裴逍遙輜德是舉白駒遯時世事孰與思我

猶人寘之晉序有客信信獨寐寤語

天高地卑玄黃烟溫人道交泰自昔先民耽
文合好輔德與仁管叔罕僑曠世難鄰脩組
施結玄升生塵咨我與子遘會當身琴瑟在
御永愛纏綿

瞻彼江澳言詠其潭所謂伊人在水之陰餐
和以泰樂道之潛錦衣尙絢至樂是耽興言
永思繫懷所欽愛而不見獨寐寤吟

詩以言志先民是經乃惠嘉訊德音惟馨欽

詠繁藻永結巾情華文傷實世士所營達人
神化反之混冥交棄其數言取其誠思與哲
人獨寶其貞

中陵 四章

瞻彼中陵蘭英猗猗允矣君子樂且有儀沈
仁育物玄聰鏡機德克闡庭名逸南畿祁祁
俊友言酌言依

鼓鐘于宮百里震聲疊疊令聞歸我偉貞厥
震伊何駿奔以驚厥問伊何民胥以寧有鶴

在陰非子離鳴我有好爵非子孰盈

潛龍遯初有鳳戢韋王猶未泰彝倫錯違臯
門重闢資爾啓扉庶績適敷非爾焉綬翼翼
京宇俟爾攸晞民之胥望如渴如饑

德音來惠覆玩三周沈澗淵洞逸藻雲浮結
心所親曷變曷渝路隔津梁一葦限殊終朝
之思三秋是踰愛而不見興言踟躕

答孫顯世

十章

邈矣上祖垂休萬葉廣問弘被宗軌峻躡高山

克荒大川利涉繁藹惟祐風連雲接

大人有作二后利見九功敷奏七德殷薦開寶
重芳勞烈再扇奕世弘道天祿來安

道弘振古祚未替今如彼在川亦有浮沈大韶
既素響非我音豈曰荒止塗弗克尋

昌風改物豐水易瀾百川總紀四海合源在彼
焉取聿來莫觀曾是褊心敢忘丘園

員暉偏照玄澤謬盈發彼承華頓此增城紀景
靈雲倦遊紫庭匪曰能知寔泰長纓

煥矣金虎襲我皇猷孰云匪茲仰姚蒼流往蹇
來反弭迹一丘變彼東朝言卽爾謀

振振孫子洪族之紀志擬龍潛德配麟趾引服
朗節克明峻軌遵彼中皐於穆不已

於穆不已大都是階之子于命民膺如隕厚德
時邁協風允諧惠此海湄俾也可懷

乃眷丘林樂哉河曲解紱披褐投卬懷玉遺情
春臺托蔭寒木言念伊人溫其在谷

道俟人行辭以義輯和容過表余未云執惠音

弘播清風駿集懷德形懽臨篇景立

孫拯贈陸士龍十章附

五龍戢號雲鳥纂紀淳化旣離義風蕭始軒
冕垂容文教乃理奕奕英族感德豐祀

於赫皇吳應天統元蒸文烈公光讚懿勲九
命重輝恭德彌勤華轍襲藻金石載振

淵哉陸生本顯洪胄亦崇懿風邈比弘裕無
兢惟德豐光伊茂文以義好施以仁富

山積惟峻道降名遐潛景在淵龍躍承華旣

升爾儀誰不允嘉有淮重淵載清其波
濟濟皇朝義義髦士序爵以賢惟俊羣止
翩三官令聞不已乃遷華閣皇典斯紀
思文大謨恢我王猷清風肆穆雅憲允休邁
彼江川邈此北流微言蘭馥玉藻雲浮
遭時之險虎牢滔天憑德美重繫此俊賢休
否旣亨名以德淵清微伊鑠鑠之彌堅
明明大象玄鑒照微顯允君子求福不回善
挹引慶險以德祈澄淵以靜罔久不暉

釋彼遊寄樂此窈貞形以神和思以道新書
雲方乘芳餌可捐達觀在一萬物自賓

寂寂重門誰和子音瞻彼晨風思託茂林

失題

八章

悠悠縣象昭回太素清濁迭興升降啓度遺和
旣爽季春告暮朱明來思青陽受煦

日征月盈天道變通太初陶物造化爲功四月
惟夏南征觀方飢風有集飄颻南窓思樂萬物
觀異知同

有汴蕪麥甘田未播黍稷方華中田多稼庭槐
振藻園桃阿那薄言觀物在堂知化

蓬戶惟情玩物一室明發有懷念昔先哲通夢
幽人彷彿遺烈清暉在天孰與永日

乃啓遺籍思予大觀幽居傲物顧景怡顏况惟
解舞衡門重闢思媚古人有懷良盤沈職含輝
芳烈如蘭

厥初生民有物有類自古有稱大寶以位征徒
式好俊奔攸遂啓予有聞誨爾達貴

達貴伊何天爵無榮渾淪大昧混其濁清毀方
遯象遺頑履貞道實藏器景以昭形

芒芒陋世奚競奚錯牧彼紛華委之冲漠漂志
垂天矯心馮閣通好莊眎儀刑有作安得達人
顧予命薄

失題

六章

思樂芳林言采其菊衡薄遶塗中原有菽登彼
脩轡在林寤宿彷彿佳人清顏如玉

予美亡此誰爲適道容與俟之玄髮方皓躑躅

山阿玩此芳草願食其穎庶以遺老

壘壘嘉時飄忽棄予有瞻逝深永歎潄潄登願
扶桑仰結飛昇伊人匪存遺芳孰與

精氣爲物或降或升徂落攸往神奇有登死生
爲徒存亡曷勝謂予不信遺籍有徵

閒居外物靜言樂幽繩樞增結甕牖綢繆和神
當春清節爲秋天地則爾戶庭已悠

嗟彼懷人悠悠其潛念昔先烈有懷所欽駭情
玩世堂允南金瓊輝邈矣誰適爲心明發興言

忼慨芳林

失題

笑哉良友稟德坤靈明照遠鑒幽微研精超跡
皇英質如瑤瓊贈我翰林示我丹誠道同契合
體異心并自頃西徂合于五樓遲想歡撫觀我
良疇亦既至止願言莫出室邇入隔中情則愛
抱恨東遊神往形留何以合忍寄之此詩何以
寫思記之斯辭我心愛矣歌以贈之無祕爾音
不我是貽

失題

有笑一人芳問芬葩嗟我欽羨夢想光華亦旣
至止上下欣嘉德覆秋蘭容茂春羅淑似令娣
惟予陋何雖有良友朽木難加愛樂朋規贈以
斯歌皆能載之其笑孔多嗟痛薄祐並懼哀苦
堂構旣崩過庭莫覩我悴西隣子沈東土契濶
艱辛誰與晤語身滯情往神遊影處發夢宵寐
以慰延佇

答兄平原

五言

悠悠塗可極別促怨會長街思一作戀行邁興
言在臨觴南津有絕濟北渚無河梁神往同迹
感形留悲參商衡軌若殊迹牽牛非服箱

答張士然

行邁越長川飄飄月風塵通波激枉渚悲風薄
丘榛脩路無窮迹井邑自相循百城各異俗千
室非良鄰歡舊難假合風土豈虛親感念桑梓
域髣髴眼中人靡靡日夜遠眷眷懷苦辛

爲顧彥先贈婦往返四首

我在三川陽子居五湖陰山海一何曠譬彼飛
與沈日想清慧姿耳存淑媚音獨寐多遠念寤
言撫空衿彼笑同懷子非爾誰爲心

悠悠君行邁犄犄妾獨止山河安可踰永路隔
萬里京室多妖冶粲粲都人子雅步擢纖腰巧
言發皓齒佳麗良可美衰賤焉足紀遠蒙眷顧
言銜恩非望始

翩翩飛蓬征郁郁寒水縈遊止固殊性浮沈豈
一情隆愛結在昔信誓貫三靈秉心金石固豈

從時俗傾笑目逝不顧纖腰徒盈盈何用結巾
欵仰指北辰星

浮海難爲水遊林難爲觀容色貴及時朝華忌
日晏皎皎彼姝子灼灼懷春粲西城善雅舞總
章饒清彈鳴簧發丹唇朱絃繞素腕輕裾猶電
揮雙袂如霧散華容溢藻幃哀響入雲漢知音
世所希非君誰能讚棄置北辰星問此玄龍煥
時暮復何言華落理必賤

芙蓉

綠房含青實金條懸白璆俯仰隨風傾煒燁照
清流

陸清河集卷之四

晉吳郡陸雲士龍著

明閩漳張爕紹和纂

騷

九愍

昔屈原放逐而離騷之辭興自今及古文雅之士莫不以其情而玩其辭而表意焉遂厠作者之末而述九愍

裔皇聖之豐祐膺萬乘之多福真龍暉以底載

啓元辰而誕育考度中以錫命端嘉令而自肅
蘭情馥以芬香瓊懷皎其如玉希千載以遙想
昶遠思而自怡範方地而式矩儀穹天而承規
結丹欸於璇璣協朱誠於四時咨中心之信脩
佩日月以爲旗悲年歲之晚暮殉脩名而競心
仰勲華之耿暉詠三碑之遐音握遺芳而自玩
挹清露於蘭林陰雲紛以興靄颼風起而回波
黨朋淫以惡笑疾傾宮之揚娥樹椒蘭於瑤圃
掩夜光於瓊華邁貞心以誰忒毀玉質而蒙瑕

甘莠言而棄予忽遐放其若遺瞻前軌而我先
顧後乘而駕遲遵荒塗而伏軾撫鳴鸞而稱悲
感瞻鳥之有集嗟離雁之焉歸靜沉思以自瘁
願凌雲而高飛

脩身

逢天怒而離紛遘時咎於惟塵端周誠以恪居
祇後命而自寅悲讒口之罔極隔離情於參辰
豈三錫之又睇乃齋予於遐賓運羽權以涉江
浮鄂渚而駕言背夏首以窘逝今泝行川而永

歎結風回而薄水兮源波榮而重瀾情懷眷以
疊結舟淹流而中盤和愁心以自邁蕭榜人而
曾謳詔河馮以清川命湘娥而安流濟南詔以
佇望野蕭條而振疇默悲號以命侶鳥狂顧而
鳴仇悲我行之悠悠怨同懷之莫求發辰陽而
往彼緣湘沅而來假亦芳樹於縣車秣梁苗於
樊馬山高高以藏景雲掩靄而荒野鳥拊翼於
薨巔水回波於宇下指明星以脈路景卽陰而
無旅隨長川以問津響脩聲而和予聽歸音以

自聞踐無迹以窮處雖遭愍之旣多亦顛沛其
何侮仰衆芳之遺情希絕風之延佇亂曰有鳥
翻飛集江湘兮彼美一人莫予將兮念茲涉江
懷故鄉兮生日何短感日長兮顧我愁景惟不傷兮

涉江

積沉毒於苦心蒐憑虛以飄蕩
形息景於重陰虎鳴飈以拂谷螭回雲而結林
操土音以懷郢涕頻代而盈襟辭終古之舊墟
託茲邦而遙集望龍門而屢顧攀惟桑而抵泣

悲愁心之難狀振枯形而獨立撫彫容之日頽
怊炯思而弗及聞先黎之達教固積善於遺慶
睎明休而受言想介福之保定靡心貞以祇服
泝大順而委命君在初之嘉惠每成言而永日
怨谷風之攸歎彌九齡而未徹願自獻於承聞
悲黨人之造膝舒幽情其曷訴卷永懷而淹恤
嗟哲士之足歎傷邦家之殄瘁痛靈脩之匪懷
頽九成於一簣忘大寶之勿假輕挈甕之守器
仰剪翮於凌霄俯歸飛於矰罟毀方城於泰川

投江漢於泥涓悲彼黍之在郢悼宗楚之莫餽
撫傷心以告哀將斯情之孰慰

悲郢

登高山以遐望念悠處之淹流豈大川之難濟
悲利涉之莫由申脩誠以砥節反內鑒而自求
考余心其焉可往稽度於神謀訪斯言以卜居
想貞龜以告猷將矯翼而塗險思振清而世濁
兌釋筮而評子諒不疑其何卜朝彈冠以晞髮
夕振裳而濯足有懷沙以赴淵無抱素而蒙辱

愁纏綿以宅心長歎息而飲淚步江潭以彷徨
頻行吟而含悴遇漁父之戾止興讜言而來憇
雖懷芳而握瑜懼輕塵之我穢顧虛景而端形
矧同波於俱醉迫伊人之逍遙聊仰葉於林側
懷達心以遠寤怡哀顏而表色仰班荆之遺情
想嘉訊而良食若有言而未吐忽棄予而凌波
揮龍榜以鼓汰遺芬響而清歌俟滄浪之濯纓
悲余壽之幾何愧褊心之歎渝恨爾謁之莫和
捐江魚之言志營玄寢於汨羅苟懷忠而死節

豈有生之足嘉

行吟

悲怨思之多感情惆悵而遠慕世玄黃而旣渝
心居貞而抱素冀斯氣之一清要佳人於天路
芳年載以遲之悲歲律之已暮攬豐草於朝日
思先睎於湛露規法圓而天象矩則方於地形
祇信順以自範邀式穀於神聽悲登覓之無抗
訊貞夢而通靈悔抱道而懷顧悲實蕃之已盈
塤椒丘而息駕振初服而翱翔結瓊蕤之芳襟

襲凌華之藻裳懷瑤林之珍秀握蘭野之芳香
命巫咸以啓期訪百神而考祥靖衆言以聽命
欽靈譔而肅邁振華冕之玉藻精象軒之高蓋
鸞假翼以鳴和霓揮景而縈旆芳塵穆以煙熅
彤雲起而深藹遊八極以大觀解飛轡以長想
將結軌而世狹願援楫而川廣雖我服之方壯
思振策其安往舒遠懷以弭節褰世羅於天網
亂曰猗猗芳草耀川阿兮朝日來照發豐華兮
秋風蕭瑟凝霜加兮傾葉懷春猶俟河兮

紆思

徧周流而無過悲窮思之永久聽幽荒而罔詔
杳寥廓而無友沉流液於繩樞逝回飈於甕牖
呼寂寞而靡應攬虛無其何有神悠悠而永念
憂綢繆而盈室哀惻心而響起時棄予而景逸
招逝運其難徵儀遺範而無律雖芳林之將焚
豈蘭響之可謐晞馥風於曠野思同芬而靡質
命險太其靡常道離隆而匪易紆幽情而思古
援在昔而立碑俟重華以同遊悲瑤圃之難適

舟登陸其焉濟輪涉淵而無迹悲荒塗之旣舛
臨遵渚而投策欲隨波以周流恨匪石之難頽
將從風而卷舒悲值矢之離懷貞朗志而玉折
厲勁心而蘭摧喟我懷以寤歎闢前鑒而自融
忠與邪其莫可登余命之所窮俯投迹而世淹
仰睇志而道隆耻蒙垢於同塵思振袂於別風
明爽心以畢志考吾道以自終

考志

天機偏其挺蓋玉衡運而回襄景彌修而日短

時愈促而夜長和音變而改律乘風革而爲商
感秋林之風暮悲芳草之中霜存倏忽而風邁
逝揮霍而雲散方輕焱而燭遲比收電而景宴
將愉樂以夙興迢良日於昧旦痛予生之不辰
逢此世之多難將藹藹而未颺世渾渾其難澄
風頽山以離谷波平淵而爲陵道曠世而朴散
化固滯而物凝恨輜德以莫舉悲民鮮之孰勝
景照明以妙見音振響而攄聞金淬堅以示斷
芑靡質而效芬馨貞規以殉節反蒙謫於朋羣

咨小心以惴惴悲江草之芸芸亂曰浮雲曉藹
天明息兮增羅重設鳳矯翼兮梧桐逝矣樹榛
棘兮思我芳林喟歎息兮

感逝

哀時命之險薄懷斯類以結憂手拊膺而永歎
形傾景而長愁生遺年而有盡居靜言其何須
將輕舉以遠覽眇天路而高遊結垂雲之翠虬
駕琬琰之玉輿揮采旄以煙指靡華旌而電舒
命日月以清天吾將遊乎九閼命屏翳以夕降

式飛廉以朝興塗蒙雨而後清景貞暉而先登
陪湘妃於雕輅列漢女以後乘瓊娥起而清嘯
神風穆其來應駢憑雲而響駭驂嘯天而景凌
瑩紫微以振策躡太階而遂升飛芝蓋之翼翼
回雲車之嶙嶙朝總轡於扶桑夕飲馬於天津
伐河鼓以解徵迄昆崙而凱振軌凌虛而遺迹
塵蒙颺而絕輪豈遠遊之無樂懷故都而傷情
靡龍首以還顧轉瑤衡而回縈泝飢風以流盼
悲舊邦之穢傾眷南雲以興悲蒙東雨而涕零

凌百川而絕蹈仰濯髮於崢嶸豈沉瘁之足弭
將蟬蛻於長生

征

痛世路之隘狹詠遂古而長悲鏡端形於三接
照直影於太微祇申懷以眷慕豈鑒寐而忘歸
悼天朝之遂晦構貝錦於繁文侈南箕以鼓物
藹青陽而播芬迹同塵而壤絕景和光而天分
俯隕息於縈波仰頽歎而崩雲折若華以翳日
時靡靡而難停食秋菊以却老年冉冉其旣盈

欲假翼以天飛怨曾颺之我經思戢鱗以遁沼
悲沉網之在淵有河清而志得挫千載之長年
擗哀響於頽風寓悲音於絕絃嗟有生之必死
固逸我以自休彼達人之遺物甘褰裳而赴流
矧余情之沉毒資有生以速憂悼居世其何感
脩與短其足奚曷久沉於汨羅投瀾漪而負石
涉清湘以懷沙臨恒流而自墜蒙濬壑之隆波
接申胥於南江

於

鼓層雲以携手

仰接景而登遐

啓疏

陳吳王起西園第宜遵節儉啓

郎中令臣雲言伏見西園大營第室雖未審節
度豐儉之制然用工甚嚴竊懼事不得濟愚臣
管見輒敢替言臣竊見世祖武皇帝臨朝淵默
訓世以儉卽位二十有六載宮室臺榭無所新
營屢發明詔厚戒豐奢國家纂承務在遵奉而
世俗陵遲家競盈溢漸漬波蕩遂已成風雖嚴
詔屢宣而侈俗滋廣每觀詔書衆庶歎息清河

王昔起墓宅未及極偉時手詔追述先帝節儉之教懇切之旨形于四海清河王毀壞城宅以奉詔命海內聽望咸用欣然臣慮以先帝遺教日以凌替聖上憂勤猶未之振今與國家協崇大化追廟前蹤者實在蠲下先敦素朴而後可以訓正四方示民知禁竊謂第室之設可使儉而不陋凡在崇麗一宜節之以制然後上厭帝心下允民望且自開制國之用事從節省而方於此時大造第宅又非聖意從簡之旨臣以凡

才殿下不以其驚闇特蒙拔擢將以臣能有狂
夫之言可以裨補聖德臣自奉職已來亦思竭
忠効節以報所受之施是以不慮犯迂敢陳所
懷如愚臣言有可采乞垂三省

吳王晏答陸雲令附

吾以頑弱過蒙殊寵夙夜祇懼忝思先恩承
風誠以自錯厲得爾委曲省以撫然意旣在
儉約又欲奉遵法憲豈忘於心國自宜有宅
城內求不可得官徒右軍來䟽覆此屋恐或

不可久得側近宮掖故於國作宅不作觀望
使如凡家法足止而已耳平量畫圖當往相
示動靜以聞

又疏

臣雲吉聞一日敢獻謬言以干聞聽天恩未加
咎責猥發明令臣伏誦聖旨奉用歎息臣聞有
國者不患宮室之不崇患在令名之不立是以
賢人之在富貴莫不卑身節欲損已挹情能保
其國家令聞百世歷觀古今以約失之者實寡
以奢失之者蓋衆非天下之至德孰能居豐行
儉在富能貧清儉節素自殿下家道此所以懷
集四方而使兆民服者也世祖武皇帝富有四

海峽爲天子居無離宮之館身御家人之服先
帝豈欲以此道止於治身而已者哉固將必欲
遺訓百世貽燕子孫此固殿下所宜祇奉也昔
淮南太妃當安厝臣兄北下墨機時爲郎中令
從行太妃令追稱先帝養生送終事從節儉今
宜奉用遺制不事豐厚令青懇切言歸于約清
河昔起墓宅發手詔又還毀朝野之論于今未
已竊以西園第宅用功方嚴雖知聖德節儉有
素猶復思關愚言以補萬一亦臣繾綣微忠昊

天罔極之誠也至被明令聖旨炳然嘉承至道
奉以稱慶不勝下情謹疏以聞

諫吳王起觀䟽

郎中令臣雲言前啓西園第宅宜遵先帝節儉之制不宜使至豐麗被命優隆言歸謙素臣奉以欣意而聞屋宇之制旣自崇侈竊聞當復起觀六間旣非前令之旨且臣亦竊用不安臣聞詩云昊天有成命二后受之成王不敢康今四祖創基旣垂成命哲王繼體世祖恭儉殿下承之固宜奉不寧而自昔造第過度民歎其勞瘁士譏其過尤謗言未弭而又加以崇侈此誠不

可不惜先帝背世曾未十年而儉德之亡國爲其首此又所以慷慨酸心而不敢不盡狂夫之諫者也按晉魏以來諸侯奢靡第室滋廣未有如國今日之甚者也古人之戒猶云無爲福始况今猶崇豐侈作爲禍先此又臣所以寤寐憂歎忘寢與食者也殿下誕應運期首建大國固將憲章令典貽範萬世始基之制不可不慎今設爲豐奢以示將來子孫象之又何以能國且先帝勤家如彼其素殿下承之若此其泰進傷

奉國之典還虧隆家之崇用之當身損盛德之
譽垂之後嗣非興邦之制一舉而失四得此古
人之所以長太息者也且第宅之過朝野所譏
而監司結舌莫敢明言者實以殿下國之昵親
朝所欽重故隱司過之鋒結執憲之繩耳後世
直臣必將信威明法考制度禮愚以此觀有必
毀之理苟此物不可終然誠不如不爲使其無
毀也今空設過制之物而終爲直士之資臣又
未見其可也惟殿下思愚臣之言時命有司必

省此舉舉手健選伏用流汗

吳王答令附

中間表作舍先畫圖呈啓閣數又五木林檎
無他鏤飾示無乃越法奢靡古今無匹也間
外啓作小樓北望河東公主園宅自不爲觀
故便聽之耳今行者歎息致朝野之譏耶省
奏具意勅毀之

請吳王引師友文學觀書問道啓

郎中令臣雲言聞古之君子旣盛德在身又外
求諸物是以廣納俊士博觀載籍朝夕師傳夙
夜勤禮賓友嘉客講義於前往古來今日聞于
耳故知積德廣而流芳罔極伏惟殿下天資聰
敏應期挺秀聖敬敷聞輝光日新卽位已來仍
遭不造大禮雖闕哀故茲有賓客無接覲之宴
師友闕講誦之禮愚臣所以寤寐永歎而私懷
慷慨者也愚以宜發通客之令使朝士有接見

之緣又可時與師友文學披觀文籍坐而論道
非學無以聞義非士無以行禮禮義旣舉羣望
允塞此臣下所以拭目思德音之發者也臣區
區所懷敢以聞

吳王答令附

多喪故乃初未與羣臣會同比當請師友文
學內外實屬也

又啓

臣雲言臣前啓可與師友文學觀書論道今又
天時清適正是講誦之日臣聞崇山之高不厭
其峻滄海之量無限於廣是以周公一日萬事
猶復旁觀百篇孔子假期玩年至於韋編三絕
由是言之雖聖之弘亦不能不求之於學也伏
惟殿下明德光劭天資秀朗方當光演文武允
廸皇猷如復垂精古今之奧仰覽千載之籍則
神道叡知無物不照且師友文學朝選於衆以

德來教雖豐祿崇禮已隆其人而先王之道未
簡聖聽在位累載官廢其職每聽其言亦懷慊
慨臣以可於良日就講經學先闡大道永播芳
風愚臣區區敢獻瞽言

吳王答令附

多病疾難以辭公事爲目力風疾連動故未
能用小差當如所陳乞毋識忠至之誠輒以
存心

請吳王入朝啓

郎中令臣雲言殿下自卽統今日來旣仍多哀故
聖體亦恒不安和自不朝見二宮已經年載前
旣比造趙軹近又自表出城至五日問訊輒以
疾聞臣切所未安愚以此五日輿駕宜入朝臣
聞事君之道苟在盡規知無不爲是以愚臣敢
獻瞽言

吳王答令附

多不快不數朝覲幸恩詔見恕耳五日當入

朝也

諫吳王覆校諸官啓

郎中令臣雲言伏見令書以部曲將李咸馮南
司馬吳定給事徐泰等覆校諸官市買錢帛簿
率日決咸南等治書以下無所復司而察錢帛
重寶姦吏多情出入之用誠宜使虛實當法以
防檢巧僞然臣愚以聖德龍興光有大國選衆
官材庶工肄業臣以虛薄忝竊朝右雖質弱任
重無益補察至於奉已思勤昊天罔極中尉該
大農誕皆清德淑慎恪居所司其下衆官悉州

闕一介䟽闇之咎雖可日聞至於處義用情庶
無大戾今咸南軍旅小人定泰士卒廝賤非有
清慎素著忠公足稱今猥使此等任以覆校大
臣所關猶謂未詳咸等督察然後得信旣非開
國勿用之義又傷殿下推誠納下曠蕩之量雖
使咸等能盡節益國而功利百倍至於光輔國
美猶未若開懷信士之無失况咸等所益不過
姑息之利而名使小人用事大道凌替此臣所
以慷慨也亂之所興在於小人得親治之所廢

在於君子自替廢與治亂由此而已臣備位大
臣職在獻可苟有管見敢不盡規愚以宜發明
令必罷此等覆察衆士一付治書則無外之度
光照遠大信臨下人思盡節矣謹隨啓以聞

請防不法啓

郎中令臣雲言國人兵放橫多行非法至使暴
及市道聲聞京邑親信兵乃罵詈洛陽市丞遠
近囂然聲論日廣而王者前後所報每蒙寬宥
故羣小敢肆其暴虐前輿駕當東時臣具以奏
聞上立節度亦備嚴上下司察念在奉宣而親
信卒泰矯稱突關強市民物至使行道哀窮路
人歎惋臣下祇命幸使罪人時獲僉以泰宜加
重戮以戒肅方來軍都督李嬰行實姦穢然身

備主人雖不致法猶加捶楚王者奏泰依嬰決
罰事寢不出而特令原泰泰之凶狡罰至大辟
至於今日不蒙薄罰臣切以自今羣醜虎視競
爲暴虐矣小人得志則下凌上替前卿顯言事
大農文肯倨傲反成却安功名之士議在不辱
而顯等恃恩敢行侮慢臣時列啓并呈顯言事
寢不省是以自來拱嘿未敢多言切見國法日
侈而恩宥無已誠懼威禁遂頽醜聲茲聞愚謂
自今宜齊之以法使下知禁有司所執猶宜時

聽不然以往則監司之吏鋒鉅靡加而隼繩替
矣臣忝竊非據與聞國事服事以來荏苒三年
朝憲多違威御無列奸問不登而流聲播越皆
由執政之臣官非其人常思收迹自替以避賢
路退惟受遇徵報未効是以恐垢素餐敢用文
諫惟殿下哀明愚臣繼繼愚臣不以前後干迕
多見罪責臨紙慷慨言不自盡